



*Iesus guarit le fils d'un Seigneur de Cour, qui par apres creut en luy,
& toute sa famille.*



IN SI que Iesus venoit de Ierusalem, il s'achemina derechef en Cana ville de Galilée, où peu auparavant il auoit changé l'eau en vin. Et y fut receu des Citoyens amiablement, le respectans pour les œuvres qu'ils auoient veu de luy en Ierusalem au iour de la feste. Or en cette contrée y auoit vn Seigneur de Cour qui auoit son fils fort malade en Capharnaum, lequel ayant oüy que Iesus estoit venu de Iudée en Galilée, s'en alla vers luy, & le pria qu'il descendist pour guarir son fils, car il s'en alloit mourir. Adonc Iesus luy dit, Si vous ne voyez des signes & miracles, vous ne croirez point. Alors cét homme de Cour luy dit, Seigneur, descendez deuant que mon fils meure. Iesus luy dit, Va, ton fils est en vie, & en santé; cét homme creut à la parole que Iesus luy auoit dit, & s'en alla; & comme desia il descendoit, ses seruiteurs le rencontrèrent, & luy annoncerent ces bonnes nouuelles, disant: Ton fils vit; il leur demanda à quelle heure il s'estoit trouué mieux, & ils luy dirent, Hier à sept heures la fièvre le laissa. Le pere donc conneut que c'estoit à cette heure-là que Iesus luy auoit dit: Ton fils vit; & lors il creut, & toute sa famille. Ce second signe fit encore Iesus, quand il fut venu de Iudée en Galilée.